

# ALAHADY NY VATANA AMAN-DRA MASIN'I KRISTY

TAONA B 2021



« *Raiso, fa Vatako ity... Ary nolazainy taminy hoe: Rako ity, dia ny Ran'ny fanekena vaovao izay alatsaka ho an'ny maro* » (Mk. 14: 22, 24)

Vakiteny I : Eks. 24, 3-8

Tononkira : Salamo 115

Vakiteny II : Heb. 9, 11-15

Evanjely : Mk. 14, 12-16. 22-26

Ry Kristianina havana, tamin'ny Alahady lasa teo isika niara-nankalaza ny Trinite Masina izay maniraka antsika hibanjina ny fiombonan'ny Ray Zanaka sy Fanahy Masina. Izany fibanjinana izany dia antso ho antsika tokoa mba ho fianakaviana iray ao amin'ny Trinite Masina isika. Io no asongadin'i Papa ao amin'ny Ansiklika FRATELLI TUTTI, izay manasa antsika hiroso amin'ny fanorenana ny maha

OLO ARAIKY ISIKA JIABY fianakaviam-ben-janahary, fianakaviam-ben'Andriamanitra. Tsy ho tanteraka izany raha tsy mivelona ny fahafoizana isika, raha tsy miaina ny fanompoana ao anatin'ny fahamarinana, marina tsy misy fihatsaram-belatsihy. Izany no nahatonga antsika milaza fa ilaina ny fihavanana ho voadio araka ny Evanjely izany hoe zary "fihavanana évangélisé". Mitaky "fiovam-penitra mahery amin'ny fihetsintsika, amin'ny fitondran-tenantsika". Izay no asan'ny Fanahy Masina mitondra amin'ny "depart vaovao", amin'ny Pantekôty vaovao ka zary EOVI MISIONERA ISIKA TABERNAKLA VELONA. Marina fa amin'ny Eglizy eran-tany, dia tamin'ny Alakamisy teo no nankalazana ny Vatana aman-dRà Masin'i Kristy, fête Dieu na Corpus Domini no mahazatra antsika.

Ankalazaintsika androany amin'izao Alahady izao ny fankalazana izany fety lehibe izany na dia indrisy indrisy indrisy mikatona ny Eglizy. Ny Eglizy trano no mikatona fa ny EOY, ny Eglizy Olona Velona Tempolin'ny Fanahy Masina afaka midera sy mankalaza hatrany an'Andriamanitra. Raha ny marina dia izao tokoa ny fanaovantsika "procession" diam-bavaka be hanambarantsika fa eo anivontsika tokoa Andriamanitra fa tsy Andriamanitra lavitra no Andriamanitsika. Matoa isika manatanteraka ny "procession" tsy hoe fireharehana na fisehoana fa mahery na poerapoera sanatria fa fanehoam-pinoana sy ilazana fa tsy Andriamanitra lavitra fa eo anivontsika ny Andriamanitsika. Izany no antony nanatanterahan'i Jesoa ny Eokaristia Masina tamin'ny Alakamisy masina mba ho eo anivontsika mandrakariva Izy ary nilaza Izy "*Ataovy izao ho fahatsiarovana aho*". Tsy fisehoana na manao "caranaval" isika fa vavaka fiombonana no ataontsika ary fanehoana fa eo anivontsika i Kristy, Andriamanitra mikolokolo antsika nahafoy ny ainy ho antsika i Kristy satria ny vatana aman-drà masin'i Kristy mihitsy no ankalazaintsika, izany sorona izany no ankalazaintsika isaky ny manao ny Eokaristia isika. Ny Teniny sy ny Tenany no nomeny antsika ho sakafo mamelona antsika. Fanehoana an'izany ny prôsesio ataontsika. Raha dinihina izany rehetra izany dia izao vanim-potoana sarotra izao indrindra no rariny sy hitsiny ary mahavonjy raha mamakivaky ny tanana I Jesoa handripaka, hanapotika an'ity KORONTANAVIRUS ity, nefa korontana tokoa ny fiainantsika ka mifangaro ny zava-drehetra ka izay hamonjy indray no ailikilika. Samy miantso fanasitrana nefa ailikilika ny mpitsabo na koa tsy sahy manatona ny mpitsabo...

Maninona no asiana fety hankalazana ny Vatana aman-dràn'i Kristy manokana aorian'ny Trinite Masina?

Fa satria tian'ny Eglizy ho tsapantsika sy hivelomantsika ny hoe tsy Andriamanitra lavitra ny Andriamanitsika fa mikolokolo sy mamelona antsika amin'ny alalan'ny vatana sy ny rany, izany hoe fitiavan-dehibe no asehon'Andriamanitra antsika. Izany no tian'Andriamanitra ambara amin'ny alalan'ny diam-bavaka na "procession" ataontsika. Indrisy tsy tanteraka. Nefa araka ny voalazantsika noho ny Asan'ny Fanahy Masina dia afaka manatanteraka "am-panahy" ny diam-bavaka isika. Izany hoe afaka mitondra am-pinoana mamakivavaky ny tananantsika ny Sakramenta Masina isika. Manantena isika fa noho ny maha-Tabernakla velona dia hitondra an'I Jesoa isika ka Izy hanasitrana antsika.

Tsara fantarintsika koa fa ny Eokaristia dia mampiray antsika ao amin'i Trinite Masina ary ao amintsika samy olombelona ary mampiray antsika amin'ny zava-boahary manontolo. Isanandro isika mankalaza ny Eokaristia fa androany asain'ny Eglizy asongandina manokana amin'izao Alahady fankalazana ny Sakramenta masina izao izany Eokaristia mampiombona antsika izany. Tanteraka eto ilay "nofinofy" zary hiaka hoy isika ao amin'ny Ansiklika. Azo lazaina fa ny fanaovantsika "procession" anambarantsika ny fiombonana amin'I Kristy ary mampiombona antsika samy isika. Izany no tanteraka isaky ny mankalaza ny Eokaristia, na manao kominio ara-panahy. Ny teny frantsay "communion" dia midika fiombonana. Ambarantsika amin'ny fomba manokana izany rehetra izany amin'ny alalan'ny fihobiana na anamnèse rehefa manandratra ny Hôstia ny Pretra

Ny vakiteny androany dia mampisongadina ny hevitra tsirairay izay nolazaintsika teo, ny bokin'ny Eksaody manambara fa ilay zanak'ondry novonoina ka napetaka amin'ny tolam-baravarana no manambara fanekem-pihavanana sy ny fankatoavana an'izay fanekem-pihavanana izay. Izany koa no dikan'ny Eokaristia, i Jesoa nandatsaka ny ràny ka nanao fanekem-pihavanana mampiombona antsika amin'Andriamanitra Ray Zanaka Fanahy Masina, mampiombona antsika samy olombelona,

manova ny fifandraisantsika amin'ny zava-boahary. Efa nantitranterintsika izany tamin'ny Paka nefa ambarantsika manokana amin'izao fankalazana ny Sakramenta Masina izao. Ny hasarobidin'ny fankalazantsika manokana manampy antsika hahatsapa ny maha Olo Araiky antsika maha mpianakavy antsika. Tsy tanteraka izany fiombonana izany, izany fifampitsimbina sy fifanasoavana ambaran'ny Eokarisitia izany, raha tsy misy fahafoizana sy fanompoana ao anatin'ny fahamarinana. Izany no mahatonga ny Eokarisitia tsy misaraka amin'ny Fanasana tongotra. Io no lalana afahantsika manorina Fratelli tutti voalazan'I Papa. Manana modely mpitari-dalana sy mpivavaka isika dia Olomasina sy Olontsambatra. Anisan'izany I Victoire Rasoamanarivo, anisan'izany i Lucien Botovasoa, tsy matahotra manolotra ny ainy izy ireo mba hampiombona ny olombelona amin'Andriamanitra, hampiombona ny olombelona samy olombelona, hampiombona ny olombelona amin'ny zava-boahary. Tsy hoe hanao Mesia vaovao isika fa raha mpanara-dia an'I Kristy tokoa isika dia isika no Kristy mpiara-belona amin'olona. Izany no atao hoe EOVI MISIONERA TABERNAKLA VELONA. Matetika isika no mandray komonio. Inona no dikan'izany eo amin'ny fiainantsika andavanandro. Tsara, hoy izaho, ho tsapantsika fa tena fiakem-pinoana sy fankatoavana ny fanekem-pihavanana no tanterahantsika isaky ny mandray komonio isika. Izany no dikany ny Amen rehefa mandray isika.

Ao amin'ny vakiteny faharoa milaza fa noho ny fanoloran-tenan'i Jesoa, noho ny fahafoizany ny ràny dia madio isika ka tonga zanak'Andriamanitra. Tsy hoe fanadiovana amin'ny goma fa fanavaozana ny fiainantsika ka hahatonga antsika ho génération mpanorina, izany hoe tsy ho mpanapotika, tsy mpandrava intsony isika izany fa efa voadio. Ny manadio dia mametraka amin'ny tena toerany, ny tena toerantsika dia ao amin'Andriamanitra. Antsoina isika ho masina araky ny taratasy nosoratan'i Papa Ray masina ho antsika. Antsoina isika ho masina tahaka an'i Lucien Botovasoa.

Ny masina dia ny fitoerana ao amin'Andriamanitra ary izany ny fahadiovana. "Sambatra ny madio fo fa hahita an'Andriamanitra izy", ny fahitana an'Andriamanitra dia manambara fa zanany tokoa isika. Ny Evanjely amin'izao fankalazana ny Sakramenta Masina izao dia maniraka antsika hahay handray tsara sy hiomana tsara ny fandraisantsika ny kominio. Izany no hanaovantsika ny sakramentan'ny fampihavanana, tsy misaraka amin'ny kominio izany hoe izay mazoto mandray komonio dia mahatsiaro fa mila fanadiavona avy amin'Andriamanitra. Izay mazoto mandray komonio dia mazoto koa mandray ny sakramentan'ny fampihavanana. Izany no mahatonga ny pretra mandray antsika amin'ny konfesy isaky ny maraina. Indrisy toa lavitra izany rehetra izany no ity KORONTANAVIRUS ity. Matoky anefa isika fa tsy maintsy resy ary tsy maintsy mandresy I Kristy Ilay tsy miova omaly anio ary mandrakizay. Izy no lalana, fahamarina ary fiainana.

Manolotra ny tenantsika i Jesoa amin'izao sakramenta izao, izy no manolotra ny ainy amin'ny Eokaristia, milaza izy "Ataovy izao ho fahatsiarovana ahy". Ny "procession" ataontsika am-panahy, ny fandraisantsika ny kominio ampanahy, dia tsarovy fa asan'ny Fanahy Masina ka mahatonga antsika ho Olo Araiky ho fianakavian'Andriamanitra, Fratelli tutti hoy ny Papa mivelona ny farahalahany sy fifankatiavana eo anivon'ny mpiarabelona. Tsy fianakaviana mikombona anefa fa ny Sakramenta masina maniraka antsika ho EOVI MISIONERA TABERNAKLA VELONA, ho Kristy mpiara-belona amin'olona. Hanana fiainana Eokaristia isika. Izany no ambaran'ny famaranana ny fankalazana ataontsika "hitantana ny diantsika an'I Kristy. Ho tahaka an'i Masina Maria nandray an'i Jesoa isika koa anie ny fiainantsika. I Masina Maria no tabernakla voalohany izany hoe toerana misy an'I Kristy Présence réelle hoy isika ka izany no mampisy ny jiro mirehitra mandrakariva amin'ny tabernakla. Raha mamaly "Amen" isika rehefa mandray ny kominio dia manao tahaka an'i Masina Maria nanao

“Eny” tamin’ny fiarahaban’ny Anjely ka zary “tabernakla”. Ary naniraka azy ny Anjely nandeha namangy an’i Elizabeta, ka isika amin’izao andro sarotra diavintsika dia zary tabernakla isika rehefa mandray an’I Jesoa na “am-panahy” aza dia maniraka antsika koa Andriamanitra, maniraka antsika tahaka ny nanirahiny an’i Kristy. Zary Kristy Mpiara-belona amin’ny olona isika amin’ny alalan’ny fanompoana sy ny fahafoizana. Tanteraka ny hafatr’I Kristy amintsika : “*Ataovy izao ho fahatsiarovana ahy*”. Io no tena dikany ny jiro mirehitra amin’ny tabernakla manambara ny Fahazavan’I Kristy eo amin’ny mpiara-belona. Manompo midika mampanjaka ny rariny sy ny hitsiny, manalavitra ny rendrarendra sy ny lainga isan-karazany. Ny manompo dia maneho ny fifakantiavana, maneho asa fanasoavana “noana aho ka nomenao hanina, narary aho ka novangiana, tsy nitafy aho ka nomenao lamba”. Ny fankalazana ny Eokaristia dia tsy mijanona ao an-deglizy fotsiny fa araky ny teny ataon’ny pretra hoe “hitantana ny diantsika anie i Kristy” ka mamaly isika “isaorana anie Andriamanitra”, manatanteraka ny asa famindram-po isika rehefa mivoaka ny Eglizy araky ny fampianarana azontsika tamin’ny fankalazana ny taonan’ny famindrampo.

Izany no hahazoantsika hasambarana ka aoka ho mpanompo tokoa isika amin’ny fiainantsika andavanandro.

Ry Jesoa Kristy Tompo ô, nanolo-tena ho anay Ianao ary eo anivonay mandrakariva amin’ny alalan’ny Vatao sy ny Rànao. Ianao koa ankehitriny maniraka anay eo anivon’ny mpiara-belona aminay, izahay koa no Eokaristia ho an’ireo manodidina anay, izany no mahatonga anay ho tena EOV MISIONERA TABERNAKLA VELONA ho “generation” mpanorina satria mpampihavana, mivelona ny “fihavanana voadio”, “fihavanana évangélisé” tovozony avy amin’ny Sakramenta Masina izay , mpampiombona, mampiray. Masina Reny, ianao no Tabernakla voalohany, ampio izahay mba ho Eokaristia tokoa anie ny fiainanay. Md Josefa Ianao no Mpiaron’ny Eglizy Eran-tany matoky anao izahay amin’izao ady mafy amin’ity aretin-mandoza ity. Arovy izahay mba tsy ho resin’ity fahavalo tsy hita maso manakorontana ny fiainan’izao tontolo izao ity. Amen

Mompera Arseveka Mgr Benjamin Ramaroson